



14-04-2023

UPA 2023/143

Naqqiut

Naqqiut 10. marts 2023-meersoq taarserpaa.

Naqqiummi siunnersuuteqartoq taarserneqarpoq, siunnersuuteqartutut allaqqasimasoq: Inatsisartunut ilaasortaq Anna Wangenheim, Demokraatit

Imatut taarserlugu:

Demokraatit Inatsisartut gruppia

Inatsisartut suleriaasianni § 33 naapertorlugu aalangiiffigisassatut siunnersuut imaattoq matumuuna saqqummiuppara:

Naalagaaffimmiit akisussaaffiit ullumikkut ingerlanneqartunut suut piginnaasat pisariaqartinneqassanersut tigussaasumik ersarissarneqarnissaat anguniarlugu Rigsmyndighed aningaasaliinissaa aammalu Namminersorlutik Oqartussat qanimut suleqatigalugit nalunaarusiamik suliaqassasut siunertarlugu Naalakkersuisut Rigsmyndighed attavigissagaat piunaffigineqarnissaat pillugu Inatsisartunut aaliangiiffigisassatu siunnersuut. Nalunaarusiaq piginnaasatigut ineriartortitsinissamut pilersaarummik imaqassaaq, uagut maani Kalaallit Nunaanni akisussaaffiit angerlaannissaannut piginnaasatigut pisariaqartitassatsinnik ersarissaasussanik.
(Demokraatit Inatsisartut gruppia)

Tungavilersuut

Kalaallit ilinniarluarsimasut amerlatsikkiartuinnavippu, takusinnaasarlu nuannersuuvoq atorfiit amerlanerusut sulisorinnaasat nunaqavissuniit inuttalerneqartarnerat suli annertusiartormat. Tamannali oqaatigereerlugu pisortat ingerlatsineranni namminersorlutillu inuussutissarsiuteqartuni atorfiit amerlasuut suli nunatta avataaniit inuttalerneqartariaqartarneri suli annertuumik aamma pisariaqartinneqartoq takusinnaagatsigu.

Inissisimaneq tamanna avaqqussinnaangisarput naalagaaffimmiit akisussaaffinnik angerlaassiniartilluta namminersornerulernissarpullu anguniartillugu unammillernartutut atugaraarput.

Demokraatinut pingaartuuvoq nunatut akisussaaffinnik angerlaassuipallannissaq anguniaannarlugu aaliangersuissanngitsugut. Suna iserfigilernerlugu ilisimaqqissaassavarput, piareersarfigalugulu. Taassuma avataasigut akisussaaffiit ataasiakkaat ilinniartitaanikkut aammalu aningaasatigut pisinnaasagut naammaginangittumik pigalutigit angerlaatinnginniassagatsigit naalagaaffik piginnaasatigut suut pisariaqartinneqarnerisut ammasumik paasissutissiisutigisinnaasariaqaraat pingaartuuvoq.

Pilersaaruteqarani akisussaaffinnik agerlaassuineq innuttaasut sullinneqarnerisa ajorseriaateqarneranik kinguneqarsinnaavoq, tamannalu pissusissamisuunngilluinnassaaq.

Tamanna tungavigalugu naalagaaffik nalunaarusiamik suliaqarlunilu aningaasaliissasoq, ilutigisaanillu piginnaasatigut ineriartortitsinissamut pilersaarummik ilaqassasoq, ullumikkut naalagaaffimmiit



akisussaaffiit ingerlanneqartut pisariaqartitsinikkut suut amigaatigineqarnersut ersarissaasussamik, pisariaqartitsisoqarnera Demokraatiniit isumaqarfigigatsigu.

Nalunaarusiaq taama ittoq akisussaaffiit sorliit aammalu angerlaanissaannut qanoq piareersassanerluta aaliangersaanissatsinnut iluaqutaassaaq.

Naalackersuisut partiillu sinnerisa siunnersuummut qanoq isumaqarnersut tusassallugu qilanaarpunga, neriullungalu siammasissumik ilalernerqassasoq.

Pisortanut aningaasatigut allaffissornikkullu kingunissai

Nalunaarusiamik suliaqarneq, piginnaasatigut ineriartortitsinissamut pilersaarut ilanngullugu, naalagaaffimmiit aningaasalersorneqassaaq. Namminersorlutik Oqartussani sulisoqarnikkut aningaasartuutigineqartussat taamaattumik aamma naalagaaffimmiit utertinneqassapput. Tamannalu tunngavigalugu pisortanut aningaasartuuteqarnerulernermik kinguneqarnaviangilaq.

Namminersorlutik inuussutissarsiuteqartunut aningaasatigut allaffissornikkullu kingunissai
Soqanngilaq.

Innuttaasunut aningaasatigut allaffissornikkullu kingunissai
Soqanngilaq.